

Inatsisartut Suleriaasianni § 33, imm. 3, nr. 1 malillugu Nunat Avannarliit Killiit Siunnersuisoqatigiiffiannut aallartitat siulittaasuata aalajangiiffigisassatut siunnersuut tulliuuttoq saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 2/2023-mik Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa najukkani nunanilu avannarlerni killerni nerisat nikerartuunissaannut pyramidimik ataatsimoorussamik pilersitsinissamut, tassungalu ilanngullugu nalunaarusiami Nordic Nutrition Recommendations 2023-mi kaammattuutinik piviusunngortitsinnaanermut periarfissanik misissueqqullugit.

(Aallartitat siulittaasuut Doris J. Jensen)

Tunngavilersuut:

Nunat Avannarliit Killiit Siunnersuisoqatigiiffiata ukiumoortumik aalajangersimasumik qulequtaqartitsilluni isummersoqatigiissitsinerani 2023-mi Savalimmiuni ingerlanneqartumi peqataasut nunani avannarlerni killerni nerisaqarnikkut kulturi paasisaqarfigaat. Nunani avannarlerni inuussutissanik pilersuinerup isumannaatsuunissaa imminullu pilersorneq isummersoqatigiissitsinermi qulequtarineqarpoq, aammalu saqqummiisut nunani avannarlerni killerni nunaneersut nunani avannarlerni killerni inuussutissat, nerisaqarnikkut kulturi, pingaartumillu najukkani nerisassanik atorluaanerup iluaqutissartai pillugit saqqummiippat.

Nunani avannarlerni killerni nunat nerisaqarnikkut ileqqorisat nunani allani, pingaartumik nunani avannarlerni nunani nerisaqarnikkut ileqqorisamit sunnersimaneqartorujussuusoq isummersoqatigiissitsinermi ersarissorujussuanngorpoq. Najukkani nerisaqarnikkut ileqqorisap pingaaruteqarnera nunani avannarlerni killerni inuiqatigiinnut assorsuaq pingaaruteqartoq isummersoqatigiissitsinerup aamma takutippaa, nerisat inuussutissartaqarnerat eqqarsaatigalugu, pingaartumillu nerisassanik maangaannartitsisarnermut isummat najukkanilu nerisassanik atorluaaneq eqqarsaatigalugit.

Sumiiffinni qanittumiittuni nunani avannarlerni killerni nerisaqarnikkut ileqqorisamut annertuumik sunniuteqarsimasuni nerisaqarnikkut ileqqorisani allanit nunani avannarlerni killerni nunani nerisaqarnikkut ileqqutoqqat allaanerujussuupput. Ukiuni kingullerni sumiluunniit, aamma nunani avannarlerni killerni, nerisaqarnikkut ileqqutoqqat assorsuaq qitiutillugit sammineqarput, aammalu najukkanilu nerisassat nerisaqarnikkullu ileqqorisat pingaaruteqarnerat immikkut qitiutillugit sammineqarlutik.

Ullumikkut nunani avannarlerni killerni nunani nerisat annerpaartaat nunanit allanit eqqussorneqartarput, sumiiffinnit qanittuneersuuginnarnatik aammali nunani ungasissorujussuarneersuullutik, assersuutigalugu

sydamerikamiit. Nerisassat inuussutissartaat eqqarsaatigalugit nunani avannarlerni killerni nunani innuttat najukkami nerisassat atorlugit inussutissanik pitsaanerpaanik pisariaqartitsillutillu pissarsisinnaasut ullumikkut ilisimaneqarpoq. Taamatutaaq najukkami nerisassanik taakkuninngalu suliarinninnissaq pitsaanerpaamik atorluarneqarnissaat nalunngikkaani nunanit allanit nerisassanik eqqussuinissaq pisariaqanngilluinnarpoq.

Nerisassat nioqqutissat inuussutissartaallu pillugit paasissutissat pineqartillugit taava danskit nerisat nikerartuunissaannut pyramidit taasartagaat nunani avannarlerni killerni atorneqartarsimavoq. Taassuma takutippaa nerisassat sorliit inuussutissaqassusii eqqarsaatigalugit pisariaqartinneqarnerpaasarnersut sorliillu pisariaqartinneqannginnerpaasarnersut. Taakkunani nerisassat nioqqutissiallu arlallit utaqqiisaasumik eqqunneqartussaapput. Akerlianik innuttaasut nunani avannarlerni killerni najugaqartut inuussutissaqarniarnikkut pisariaqartitaat najugarisap qanittuani nassaassaasut tamakkua pillugit ilisimasat ilisimatusarnerillu takutippaat, taamaattumillu nunat avannarliit killiit namminneq pisariaqartitamik nerisassaatitillu aallaavigalugit nerisat nikerartuunissaannut pyramidimik sanassagunik pissusissamisuussalluni. Nunat nunat avannarliit killerniittut tamarmik immikkut najugarisaminni kiisalu nunat avannarliit killiit ataatsimoorussamik nerisat nikerartuunissaannut pyramidimik sananissaat innersuussutigineqarpoq, tassani apeqqutaalluni nunani taakkunani ataasiakkaani nioqqutissat suut pigineqarnersut kiisalu inuussutissatigut pisariaqartinneqartut suunersut.

Nunani avannarlerni killerni naalackersuisut najukkami nerisat nikerartuunissaannut pyramidimik suliaqassasut kiisalu nunat avannarliit killiit ataatsimoorussamik nerisat nikerartuunissaannut pyramidimik suliaqarnissamut suleqatigiissasut Nunat Avannarliit Killiit Siunnersuisoqatigiivisa kaammattuutigaat. Nunat avannarliit nalunaarusiaat Nordic Nutrition Recommendations 2023, -Integrating Environmental Aspects saqqummersinneqartussaasoq Nunat Avannarliit Killiit Siunnersuisoqatigiivisa paasivaat, nalunaarusiamilu kaammattuutigineqartut atuutilersinniarneqassappata Kujataaniit Avannaanut nerisassanik assartuinissaq pinnagu nerisat inuussutissartaqarnerat eqqarsaatigalugu kaammattuutit nunat avannarliit killiit najukkami nioqqutissaataannut naapertuuttuunissaat sulissutigineqartariaqartutut isigalugu.